

Augsburg, 8. Februar 1569

An Theodor Zwinger

UB Basel, Fr. Gr. II 27, Nr. 263 (nicht eigenhändig bis auf die Unterschrift); Abschrift: G II 37, fol. 197r-v.

Binas tuas literas, Clarissime Vir, Domine et amice colende, alteras 26. Decembris, alteras idibus Ianuarij datas, eodem hoc die accepi. Ab Augustano ciue nullae mihi sunt redditiae. Tabellarius Augustanus ipse confessus est, se non seruasse fidem mihi datam, cuius sumptu receperat, se et Basileam iturum et certum responsum allaturum. Ac de tuo erga me studio quid dubitem, cum res ipsa in oculos incurrat? Commentariolos Ciceronianos omnino uolo esse Episcopij, neque illi quicquam controversiae moueri ab Oporinianis. Quin et Isocratem penes eundem esse mallem. Nam Gemusaeis quantum fidendum sit, nescio. Sed tamen, quod egisti, cum gratiarum actione habeo ratum: modò promissa appareant. Scripsi etiam ad Praetorem et iudices Basilienses, ut monuisti. In titulo si quid peccatum est, imperitiam meam excuses uelim. Demosthenem graecum si ab Oporinianis extorquere potueris et Vlpianum graecum (qui non meus sed Oporini est, sed à me emendatus) ex nondinis ad me remitti uelim. Sin id illi recusarint: parua iactura est: modò Episcopius, ut antea scripsi, duo exempla Demosthenis mihi mittat, et epistolas Demosthenis atque Aeschinis. Caetera enim omnia facile potero etiam sine illo codice, quem Oporiniani habent, reconcinnare. Qui tamen etiamsi nihil mearum lucubrationum haberent, tale officiolum nec ignotissimo negare deberent. Qui si quid ad me scripserint: ab eis postulabo, ut eum librum mihi restituant. Sin nihil scripserint: perinde habebo, ac si ne tibi quidem fidem sint, seruaturi: omninoqüe dabo operam, si ullo modo potuero, ut praesens ius meum aduersus illos persequar. Episcopio ante accepta Ciceroniana et Specimen Demosthenicum nihil missurus sum: nec nisi prius certò constituerit, quando et quomodo editionem eam sit aggressurus. Mihi satis erit Demosthenem Latinum excudi cum commentarijs Vlpiani Latinis et annotationibus meis. Cum typographis hactenus ex syngrapha non egi, quòd Oporinus noster ultrò est omni fructus officio: sed nunc id necesse esse uideo. Vale Vir clarissime, et me in tuo aere esse persuasum habeto. Quin officij causa et mei studio tot molestias et labores capias sine ullo fructu tuo, non dubito. Atque utinam ego uicissim omni erga te officio fungi possem. 8. Februarij 1569. Augustae.

Hieronymus Wolfius
Tuus.